

RS i dalje ne čini dovoljno po pitanju saradnje sa Haškim tribunalom – Grupa za praćenje saradnje sa Haškim tribunalom predana u nadležnost domaćih institucija

Visoki predstavnik je danas izjavio da se RS u nekoliko navrata oglušila na brojne zahtjeve za pristup ključnom arhivskom materijalu koji se odnosi na period sukoba 1992-1995. Ovaj arhivski materijal sadrži dokumentaciju koju je koristilo osoblje Radovana Karadžića i zapisnike Vrhovne komande VRS. Međunarodni krivični tribunal je također tražio objašnjenje u vezi nestanka arhiva Predsjedništva RS. Ni jedan od ovih zahtjeva nije ispunjen.

Visoki predstavnik je naglasio da su organi RS u toku 2005. godine načinili značajne pomake, posebno nakon osnivanja Grupe za praćenje saradnje sa Haškim tribunalom u februaru 2005. godine, kojom su ko-predsjedavali visoki predstavnik i premijer Terzić. Grupa za praćenje saradnje je uspješno izvršila 10 od 12 zadataka koje joj je postavio Haški tribunal, uključujući inteziviranje regionalne saradnje, kampanje informiranja javnosti i jačanje državnih zakona kojima se regulira konfiskacija sredstava osoba optuženih za ratni zločin.

Visoki predstavnik je komentirao da *«dva nerealizirana zadatka Grupe za praćenje saradnje sa Haškim tribunalom, tj. izručenje svih preostalih optuženika i puno razotkrivanje i predaja*

arhivskog materijala, odgovornost su organa RS. Kao rezultat toga, Grupu za praćenje saradnje sa Haškim tribunalom, koja okuplja širok spektar članova iz Bosne i Hercegovine i međunarodne zajednice, treba koristiti samo kada i ako je potrebno za unapređenje interne saradnje. Ali glavni teret u ispunjenju preostalih zadataka opet leži na RS».

Premijer Terzić, koji je prihvatio predsjedavanje Grupom za praćenje saradnje sa Haškim tribunalom, izjavio je da «sa početkom pregovora o Sporazumu o stabilizaciji i pridruživanju i sve većim vođstvom koje preuzimaju organi BiH u ispunjavanju međunarodnih obaveza, Vijeće ministara sada s pravom treba da preuzme vođenje Grupe. Zadovoljstvo mi je prihvatiti odgovornost za budući rad Grupe za praćenje saradnje sa Haškim tribunalom».

Carla del Ponte je pozdravila ovaj prenos odgovornosti, naglasivši da će Međunarodni tribunal ostati u bliskoj vezi sa premijerom. Ona je potvrdila da Grupa za praćenje saradnje sa Tribunalom može biti i da će biti ponovo sazvana ukoliko bude dodatnih zadataka koje treba izvršiti, ali je naglasila da RS treba da realizira svoje obaveze.

Visoki predstavnik je izrazio žaljenje zbog kontinuirane nesaradnje organa RS sa Međunarodnim tribunalom. «Sramotno je da je prošla 10. godišnjica Srebrenice i Dayton a da Radovan Karadžić i Ratko Mladić nisu izručeni Hagu. Ni Banja Luka ni Beograd ne smiju ni za trenutak sumnjati da se taj zadatak ne mora završiti», rekao je Ashdown.